

AB

154 347



I A. f.

~~107 n.~~

zu 00 kist

Barhafftiger Gegenbericht/
Aluff die Brevsichen
 Calumnien M. Cyriaci Spangen-
 bergs / von dem Langebergischen Kirchen-
 handel/welchen er eine Ritterliche
 that / eines Accidentischen
 Vulcani/teuffet.



Durch

M. Martinum La-
 brum Pfarherrn / vnd Superin-
 tendenten zu Gera.



I S 7 4.

11

Handwritten text in a historical script, possibly Gothic or similar, appearing as bleed-through from the reverse side of the page. The text is mostly illegible due to fading and bleed-through.

Handwritten text in a historical script, appearing as bleed-through from the reverse side of the page. The text is mostly illegible due to fading and bleed-through.

Handwritten text in a historical script, appearing as bleed-through from the reverse side of the page. The text is mostly illegible due to fading and bleed-through.



Warhafftiger Begeben

bericht M. Martini Fabri / Auff

Spangenbergss Calumnien / vnd falschen bericht etc.

E hat vnlängst M. Cyriacus Spangenbergk eine Narration vom Langedergischen Kirchenhandel publicirt / in welcher er sich greulich mich zu infamieren vnterstehet: Denn er mich beschuldiget / als sey ich von meiner vorigen Bekentnis / sonderlich im Artickel von der Erbsunde / abgefallen. Item / wie ich andere vnbillicher weise habe verfolget / auch wie ich die heilige Bibel verunehret / vnd habe wollen an den Nackt schlagen / Endlichen auch / wie ich sie gar aus der Kirchen geschaffet / vnd nicht mehr in der Kirchen leiden wolle. In welchen allen er mir aber grossen gewald vnd vnrecht thut / Vnd wundert mich nicht wenig / wie doch der arme Man mit solchen groben Calumnien / sich an mir vergreiffen darff / der ich jm doch die zeit meins lebens / nichts zu leide gethan / noch jemals in vnguten etwas mit jm zu thun gehabt.

Ob nu wol offentliche greiffentliche Lügen / welcher seine Narration gantz vol ist / keiner antwort werd sind. Zu dem zwar allenthalben bey ehrlichen / verstendigen / guthertzigen Leuten diese Schmachkarte / wie ich von vielen glaubwürdig berichtet werde / sich selbst gnugsam widerlegt / vnd mich entschuldiget /

diget / jedoch weil die sache nicht alleine meine Pers-
son / sondern auch die Kirchen der Herrschafft Gera-
antriffet / Weil auch vielleicht etliche einfeltige / bey
welchen M. Spangenberg / wie der alte Prophet zu
Bethel / 1. Reg. 13. nach etwas gild / durch solche Ca-
lumnien möchten eingenommen werden / kan ich
nicht umbgehen / warhafften Gegenbericht zu thun.
Daraus man denn meine vnschuld / vnd dargegen
M. Spangenbergs grosse vnbilligkeit / die er wider
mich geübet / öffentlich spüren vnd befinden wird.

So viel nu den ersten Punct belanget / Nemlich /
meine Confession vom Artickel der Erbsünden / kan
ich mit alle meinen Zuhörern bezeugen / das ich nie-
mals anders geleret habe / denn das die Erbsünde ist
die verderbung / verunreinigung / vnd verkerung der
gantzen Menschlichen Natur vnd Wesens / darin-
nen wir von Adam her alle empfangen vnd geboren
werden / daraus alle andere Sünden fließen / darumb
vns Gott verwirfft vnd verdambt / wo wir nicht
durch Christum erlöset / vnd vom heiligen Geist
durchs Wort vnd Sacrament newgeboren würden.

Wie denn dieser Artickel weitläufftiger in vnser
Gerischen ausgegangenen Confession aus Gottes
wort vnd Lutheri schrifften erkleret wird. Nemlich:
Das die Erbsünde in vns / sey ein gantzlich vnuer-
mögen / vnuoltkomenheit / vnd mangel das Gesetz zu
halten vnd zuerfüllen. / Dadurch der Mensch mit sei-
ner gantzen Natur vnd Wesen / an seinen höchsten
vnd besten Krefft / macht vnd Wirkung / durch vnd
durch verderbet / verrückt / vergifft / vnd verkeret / gantz
vnd gar ein böser Baum / zum guten todt / vnd erstor-
ben / an welchem weder haut noch Daer / noch ichts
gut blieben. Dadurch denn vnser verstand in Gött-
lichen

lichen Geistlichen sachen gantz verfinstert / voller Irthumb vnd schrecklicher blindheit ist.

Der Wille gantz vnd gar von Gott abgewendet / voller vngewissam.

Das Dertz one Gottes furcht vnd liebe / voller feindschafft vnd widerwillen / gegen Gott vnd sein Gericht worden.

Die vorigen krefft des Freienwillens / belangende Gerechtigkeit / Geistlich / Göttlich leben / vnd die Seligkeit / sind verlorn / vnd mangelt durchaus des Ruhms an Gott.

Welche Erbsunde / in vns / fur vnd fur ist / vnd wircket / eine stettige / vnd lebendige Lust / vnd vnauffhörende Begierde / zu gedenccken / zu wollen / vnd zu thun / was Gott entgegen / vnd vns verdamlich ist. Dadurch der mensch des Teufels gefangner wordē / in seinem Reich zu thun / vnd zu lassen was im gefelt.

Summa / dadurch das erste Bilde Gottes mit aller Heiligkeit / Gerechtigkeit / vnd Unsterblichkeit / verlorn / vnd dargegen zu einem schenslichen Bilde / vnd Laruen des Teufels worden ist.

Darumb denn Gott nach seinem gerechten zorn vnd Gericht / ursach hat / den Menschen nicht alleine mit zeitlichen Plagen zu straffen / sondern auch ewig zu verdammen / vnd thet es auch / wo er nicht durch Christum den Mittler versönet vn̄ newgeborn würde.

Diese meinung von der Erbsunde / ist Gottes wort / vnd schriffen Lutheri gemesse / vnd ist bisher von M. Spangenbergem fur recht gebilliget / vnd in vnser Confession vngetaddelt blieben.

Was aber die beide wörter Substantia vnd Accidens anlanget / darüber itziger zeit so heffrig gestritten wird / hab ich mich söder zeit erkleret / Das / wenn

der grundt / welchen Illyricus legt in diesem streit /
bestehet / das man der beider eins sagen müsse / so
muß ich bekennen / das das wort Accidens, leidli-
cher sey / sintemal es zuvor von S. Augustino / vnd
andern alten vnd newen reinen Lerern auch gebrau-
chet ist / vnd in alle ewigkeit nicht erwiesen werden
könne / das die Erbsunde Substantia / oder ein Wes-
sen sey / denn daraus vnwidersprechlich erfolgete /
das endweder der Teufel ein Schöpffer / oder Gott
ein Ursacher der Erbsünden sein müste / welches denn
stracks wider Gottes wort / vnd eine grewliche Got-
teslesterung ist.

Dieweil aber die Lere von der Erbsunde ein Ar-
tikel des Glaubens ist / were das beste vnd sicherste /
man hette beide wörter / als elementa mundi, das ist /
Philosophische Wertsatzung / Colos. 2. fahren / oder
sonst an irem orte / in den Schulen gelassen / vnd nie
auff die Cantzel / oder in öffentliche Streitschriften
bracht (wie denn zwar das Accidens wol nachblie-
ben were / wo das wort Substantia nach der Wey-
marischen Disputation / one alle not / nicht so hefftig
verfochten / vnd widerumb auff die ban bracht wor-
den were) vnd redete / bekennete / vnd lerete einfeltig
darvon / wie Gott in seinem Wort / die ware Aug-
spurgische Confession / Apologia / vnd Lutherus in
seinen schriften / sonderlich in Schmalkaldischen
Artickeln / vnd andere bewerte Confessiones / Zu
welchen sich auch die jenigen so das Accidens der
Manicheischen Substantz haben opponirt bekenn-
nen / darvon reden vnd leren. Vnd wie Paulus 2. Ti-
moth. 1. vermanet / das man hielte an dem Furbilde
der heilsamen wort vom Glauben. Des vnnützen /
Geistlosen geschwetztes aber / Item der vnnützen tö-
richten

richten fragen/die wir sehen / das sie nur zancck geben
ren / solte man sich entschlahen / 2. Tim. 2.

Vnter solche törichte vnnütze fragen / vnd Geists-
lose geschwetze / setze / vñ zele ich / folgende Paradoxa
die Illyricus / vñ seine Adherenten mit grossen erger-
nis der Kirchen ausgesprenget / vnd noch durch laus-
tere Teuscherey / vnd verkerung Göttlichs Worts /
Lutheri / vnd des heiligen Catechismi zeugnissen be-
schönen / vnd vertheidigen / als nemlich:

Der Mensch ist die Erbsünde Selbst.

Die Erbsünde wird im Namen der heiligen
Dreyfaltigkeit getaufft.

Item / Christus habe Carnem alterius speciei
an sich genommen.

Vnd dergleichen / Welche von andern nach der
Lenge erzelet werden.

Das dis jederzeit meine einfeltige meinung in
diesem streit gewesen / wissen meine Misgünstigen
vnd Feinde sehr wol. Vnd ob es wol sein kan / das ich
acht oder mehr mal priuatum mit jnen von diesem
streit schriftlich vnd mündlich conferirt haben mag:
habe ich doch einerley meinung allzeit behalten / ob
wol dieselbige mit andern worten bisweilen möchte
furbracht worden sein / wie denn in solchen Collatio-
nibus zu geschehen pflegt / das nicht allzeit einerley
worte gefallen können.

Aber so fürsichtiglich vnd eigendlich kan keiner /
weder schreiben noch reden / das er sich bey seinen
Feinden gnugsam verwaren / vnd alle vrsachen zu
raddeln / vnd die wort zuuerkeren verhüten köndte /
denn Contra Sycaphantæ morsus nullum est remedium.
Darumb sie mir felschlich vnd wider jr eigen Gewis-
sen / achterley Confessiones zumessen. Aus

Aus diesem warhafften bericht ist nu gnugsam zu befinden / wie M. Spangenberg sich zu mir nöti- get / vnd vnbilliger weise / mich abfalls von meiner vorigen Confession beschuldiget.

So viel aber / fürs ander / die verfolgung vnschul- diger Prediger / die er mir felschlich zumisset / anlän- get / hat es eigentlich / vnd in der warheit / diese geles- genheit:

Es haben der gewesene Pfarherr zu Langeberg / er Niclas Fincke (welchem zwar besser / er were bey seinem Schneiderhandwerck blieben / weil er je bey seinem Catechismo nicht einfeltig bleiben wolte / an welchem er nach gelegenheit seiner kunst / vnd gaben gnugsam zu studieren / vnd zu predigen gehabt / vnd hette nicht nach höhern / vnd subtilern dingen trach- ten dürffen / dafur er denn zum offtern mal trewlich / wiewol vergeblich / gewarnet) vnd sonsten noch zwe- ne Predicanten / in der Herrschafft Gera / inen von andern / obgemelte Paradoxa / vnd falsche Leren ein- reden lassen / vnd sich vnterwunden dieselbigen zuuer- theidigen. Wie denn Er Niclas in einer Action frey heraus führe / da jm von einem Politico guter mei- nung furgehalten ward / mit diesen Worten: Lieben Herren / wie kompt jr doch auff diese weise / das jr dürfft furgeben / Die Erbsunde werde getaufft / da doch Christus im Catechismo befihlet / das man Weiden vnd Völcker / vnd nicht die Erbsunde teuffen solt. Da hat er hönischer weise geantwortet: Ey was teufft man denn anders / denn die Erbsunde. Vnd wo solt man sie denn hin thun / weil man teufft? Da doch er / vnd die andern beide zuuor durchaus mit vns in Confessione einig gewesen.

Sie haben es auch darbey nicht bleiben / sondern
sich

sich verhetzen lassen / das sie sich zu vns haben nöthigen müssen / (da wir sonsten mit jnen gedult getragen / so ferne sie nur vielgedachte vngereimte abschewliche Reden nicht auff die Cantzel gebracht) Vnd haben eine lange Schrift an mich haltend / Doch ehe sie mir dieselbige vberantwortet / zuuor alenthalben spargirt / vnd ausgestrawet / in welcher sie meine Gnedige vnd Christliche Obrigkeit / als Pilaten / Tyrannen / vnd Verfolger rechtschaffener Lerer / Mich aber als einen falschen Lerer / als der ich vom Bekenntnis der Wahrheit abgefallen / one alle schew beschuldiget haben.

Auch haben sie sich des Propheten Geists Deut. 13. angemast / vnd geweissagt: Werdet jr vns vertreiben / so werdet jr nicht lange bleiben. Sie haben vns auch sonsten ausdrücklich das ziel / als nemlich sechs wochen nach Michaelis / gesteckt vnd ernennet.

N. B.

Da man nun etliche handlung vergeblich mit jnen gepflogen / vnd sie stracks auff jrer meinung bestanden / vnd sonderlich die Paradoxa / nicht haben verwerffen wollen / Dagegen aber vnser in Gottes Wort gegründete Confession / welcher sich die andern Pastores der Herrschafft alle vnterschrieben / verdampt / Mir auch gleich damit das Superattendenten ampt / als der ich ein falscher Lerer sein solte / auffgekündiget / vnd sich von vns gantzlichen getrennet / vnd abgesondert / Hat die Obrigkeit bedencken gehabt / einen aus jnen dreyen / zu solchem Ampt an meine stat zugebrauchen / oder einen andern Superattendenten / jnen sonderlich zugefallen zuuerordnen / Vnd hat also jnen ire dienste / one mein suchen vnd vermanen / auffkündigen / vnd andere an ire stat beruffen lassen / welches ich denn fast zu wehren in bedencken gehabt. Wie denn M. Spangenberg in gleichem

B

chem

chem fall seiner Obrigkeit auch nicht gewehret hat / ja freilich viel mehr dieselbige dazu verhetzet vnd gestercket / das sie die jenigen / so da offtgemelte Paradoxia nicht (wie er) haben wollen billigen vnd entschuldigen / hat enturlaubet / welches denn im zuuerantworten stehet.

Dieraus man nun gnugsam befinden wird / das nicht ich / sondern die drey Pastores selbst / ein vrsach ihrer entsetzung gewesen sind / vnd mir M. Spangenberges Lesterkarte hierinnen auch vnrecht thut.

Was den gewesenen Schulmeister zu Langeberg Mattes Wein anlanget / ob er wol ein rechte Cloaca / vnd Kübel ist / in welches der Sathan allerley absurditeten / vnd irrige meinung schmeißt / ist er doch seines Glaubens halben (welcher noch vngewis ist) nicht entsetzet worden / Sondern hat seinen vrlaub von der gemeine daselbst / anderer vrsachen wegen / ohne meinen wissen bekommen.

Noch darff sich der Bachant grosser verfolgung rühmen / wie er sich denn in einem schreiben an mich protomartyrem nennet.

Dernach bin ich glaubwürdig berichtet worden / wie das der geurlaubte Pfarherr zu Langeberg sampt seinem Schulmeister Mattes Wein / die Bücher so der Kirchen daselbst zustendig / als nemlich die Bibel vnd das Gesangbuch / mit schendlichen Lestergesangen vnd Versen besudelt haben solten / das sie sich also rechnen / vnd jren gestanck hinder sich lassen möchten. Wie mir denn als bald das Gesangbuch zugestellet worden ist / in welchem ich das Famos libell, vnd Lestergesang (so der Schulmeister gedichtet / vnd mit seiner eigenen Hand darein geschrieben / jedoch ohne seinen Namen / wie denn die Bletter so noch vorhanden / mit welchen ich den Buben vberzengen kan ausweisen) funden habe.

Die

Mit diesem schönen Gesange / ehret der heillose
Bachant sein liebes Vaterland also / das er sonder-
lich die Kirche zu Gera / neben den Kirchen der gan-
tzen Herrschafft / falscher Lere / vnd abfalls von der
Wahrheit beschuldiget.

Da ich nun gen Langedergerk der Transaction hal-
ben / zwischen dem alten vnd newen Pfarherrn / er-
fordert / habe ich mir die Bibel auch aus der Kir-
chen bringen lassen / vnd habe das Famos libell, vnd
Lesteruers / damit M. Spangenberg so fast in of-
fentlichem Druck pranget / mit welchen mein Name
wider alle billigkeit besudelt wird / gleichfalls mit
seiner des Heins Handschrift / aber doch auch one
seinen Namen befunden / welches denn die jenigen
neben mir zeugen werden / so die Verss so wol als ich
gesehen vnd gelesen haben. Darumb die Lestertar-
ta M. Spangenburgs die Verss vergeblich / des
Famos libells halben / entschuldiget. Vnd zwar die
Bletter des Gesangbuchs / wie oben gemeldet / das
widerspiel wider in öffentlich ausweisen.

Da ich nun die Verss gesehen vnd gelesen / habe
ich gesaget / Wenn das Blatt / auff welchem die Les-
teruers geschrieben / nicht auff geleimet were (Sie
hatten aber auch sonst ein ander Blatt mit wachs
darauff gekleibet / vnd die Verss zugedack) wolte ichs
heraus reissen / vnd damit vmbgehen / wie D. Luther
mit des Myriciani Verss zu Wittenberg vmbgieng /
die er mit einem Pleto widerlegen / vnd im widerumb
gen Leibzig schicken liesse / Denn sie ja keiner andern
verantwortung würdig sind / ich mus aber der Bibel
schonen. Nach dem ich aber anderer geschefte hal-
ben habe auffstehen müssen / habe ich das Buch
meinen Geferten gegeben / vnd im befohlen / das er
die Verss solte ausleschen.

Weil aber jm die vnbilligkeit nicht weniger als mir wehe thete / weil er auch zuuorn des Myricionis-
schen Balsams von mir hatte hören erwehnen / hat
er gemeinet / es würde wol hingehen / wenn er schon
dergleichen Rubricken zum handel gebrauchte. Vnd
weil der Teufel durch die Buben einen Gestanck in
der Kirchen / durch die Famos libell hette hinder sich
lassen wollen / würde es nicht schaden / wenn man
jme schon widerumb zu danck ein Keuchkertzlein
auffsteckte / Vnd hat also die Verss mit einem Dleto
ausgelescht / doch also / das nicht ein einiger Buch-
stabe oder Blat sonsten damit berüret worden ist.

Was solt ich machen? Es war geschehen / vnd
weil ichs nicht endern kondte / habe ich einen Bogen
Papir darauff kleiben lassen / vnd habe als bald dem
Pfarherrn das Buch widerumb zustellen / vnd vnter-
sagen lassen / das er die Bibel sampt dem Gesangs-
buch / weil er sie mit Famos libellen hatte besudeln
lassen / fur sich selbst behalten / vnd bezalen solte / das
mit man ein andere Biblia vnd Gesangbuch in die
Kirche (wie denn allbereit geschehen) keuffen kondte.

Es hat jm aber die Rubricke / da er das Buch
auffgemacht / nicht gefallen / Sondern hat die Bibel
an die erden geworffen / angespeiet vnd liegen lassen.

Das ist nun die grosse Sünde / die M. Faber be-
gangen hat. Vnd sol doch der Fincke sich an der
Bibel nichts vergriffen haben / das er sie an die erde
geworffen / vnd angespeiet.

Vnd alhie kan der Herr Spangenberg sein vnter-
terscheiden / das der Fincke den hohn nicht der Bi-
bel / sondern der Rubricken erzeiget hat. Aber in vnser
that / ob wol ein jeder Rechtsinniger vrteilen / vnd sa-
gen muss / das nicht die Bibel / Sondern alleine die
Kesterschrift gemeinet / ja das ich auch das Famos
libell

libell nicht mit Golde zuüberziehen schuldig gewesen / hat er doch aus Cainischer Liebe alles vnterscheidens vergessen.

Ich habe für sieben Jaren von dem tewren beständigen vnd rechten Discipel Lutheri / D. Joachim Mörlin seligen / gehört / da ich in gegenwertigkeit etlicher anderer Pastorn in fragete / Was er doch von des Victorini Buch hielte / in welchem er den Psalterium erkleret? Da hat er geantwortet: Lieben Sönel / wer dis Buch hat / der rette doch dem D. Geist seine Ehre / vnd lauffe mit demselben nur zum Pilato zu.

Denn ist's nicht Sünde vnd Schande / saget er / das zu erklerung des furnempsten Buchs in der Bibel / da die grösten geheimnis Gottes innen begriffen sind / Victorinus ja so viel zeugnis der Heiden / als Aristoteles / Platonis / Pindari / Euripitis / vnd dergleichen anzeucht / vnd brauchet alles aus den Propheten / Paulo vnd den Euangelisten. Damit denn der Teufel vnser gleich spottet / als wolt er sagen: Ir Christen / die jr euch des heiligen Geistes so hoch rhümet / können es nicht alleine / sondern die Heiden die den heiligen Geist nicht haben / können vnd wissen eben das / das jr können vnd verstehet. Vnd gehet der Sathan nur damit vmb / das er vns von der Bibel / widerumb in die Philosophiam weise / wie im Papstumb auch geschehen.

Nun solte sich wol der fromme Doctor Mörlin mit dieser Rede bey M. Spangenbergem auch nicht gnugsam verwaret haben.

Ich frage aber alhie alle fromme / verstendige / rechtsinnige Christen / welcher die heilige Bibel am meisten verunehre: Einer der da eine falsche / Ketzerische Glossa / oder famos libell / so da in die Bibel geschmirt ist auslescht / es sey auch die Tinten / die er

dazu gebraucht / wie sie wolle: Oder derjenige / der mit falscher deutung / wider die Richtschnur des Glaubens / vnd das Furbilde der heilsamen wort / die heilige Schrift verkeret / vnd durch launere Büberrey / Ephes. 4. die zeugnis der Bibel vnd Lutheri / wie die Würffel knüpfft vnd drehet / das sie müssen alle Sess tragen / vnd die scheuslichen / vngehewren / zuvor in vnsern Kirchen nie erhorten Gottslesterlichen reden müssen iustificiren / vnd beschönen helfen / als nemlich:

Die Sünde ist ein Wesen.

Der Mensch ist die Erbsünde selb selbst.

Es ist kein vnterscheid zwischen der Erbsünde / vnd des Menschen Leib vnd Seele / Natur vnd Wesen / quia idem non potest discerni à se ipso.

Die Erbsünde wird im Namen der heiligen Dreyfaltigkeit getaufft / Vnd wenn man bersten solle.

Item Christus hat Carnem alterius speciei an sich genommen.

Vnd dergleichen Reden mehr / für welchen etwan M. Spangenberg sich von Hertzen entsetzet / vnd sie verflucht / ja wie man vom Polycarpo lieset / die Ohren dafür zugestopfft hette / Da es im nu eitel Dracula sein müssen.

Vnd ich bin gewis / das alle vnuerdecktliche Kirchen / die sich zu der warer Augspurgischen Confession bekennen / nicht alleine mit obgesetzter meiner meinung von der Erbsünden zu frieden / Sondern das auch alle verstendige / guthertzige / Christliche Leute in diesem fall mich entschuldigen / vnd das Urtheil wider M. Spangenberg vnd seinen Anhang fellen werden.

Wenn auch diese That / von einem ihres Ordens geschehen were / so müste es freilich wolgethan / vnd ein fei

ein feiner einer heiffen / wie sie denn einander fein vber
helffen können / auch in den gröbsten Lastern. Denn
Peccatum est Substantia, vnd dergleichen Paradoxa /
sind bey jnen solche dinge / die da auch decken der
Sünden menge.

Wenn ich auch lust hette jnen / mit gunst / in den
Rücken zu sehen / wie sie denn mir in den meinen lust
zu sehen / vnd zu grüblen haben / köndte ich warlich
auch mit warheit von sachen reden / die jnen vnd
vielen jres Ordens / zu kleinen Ehren gereichen wür-
den. Aber damit were der sachen wenig gedienet.

Vnd hat zwar M. Spangenberg auff dissmal
gnugsam / das er sich fur aller Welt selbst beschemet /
in dem / das er öffentliche böse Thaten entschuldiget
vnd lobet / die doch beyde in Göttlichen vnd Welt-
lichen Rechten verbotten / vnd gestrafft werden. Du
solt kein falscher Zeuge sein / nicht liegen auff den
Nechsten dein / saget Gott. So weis M. Spangena-
berg wol / was die Weltlichen Rechte von famos
libellen halten / vnd was fur straffen sie darauff orde-
nen.

Das mich auch M. Spangenburgs Lesterkarta
beschuldiget / als habe ich die Bibel öffentlich wola-
len an Kack schlagen / das ist je gar eine grobe vn-
warheit.

Ich habe gesaget das der Bachant mit dem jeni-
gen / so es in geheiffen hat / das er der Kirchen Bü-
cher mit famos libellis, Schmachgesengen / vnd Les-
teruersen / verunehren solte / in allen Rechten verdie-
net hette / das man sie zur Stauppe / oder zum weni-
sten an den Kack schlüge / Sonderlich weil er auch
seines lieben Vaterlands nicht vrschonet / Wie denn
der Hertzog von Wirtemberg einen gelerten Poeten
N.N. hat öffentlich mit Ruthen austreichen lassen /
Darumb

Darumb das er wider seinen Pfarherrn ein Famos libell vnd schmachuerss angeschlagen.

Vnd habe dazumal / wie Gott weis / vnd alle so dabey gewesen / der Bücher mit keinem wort gedacht / vnd wenn es schon geschehen were / so weren doch nicht die Bücher / Sondern allein die Famos libell damit gemeinet.

Ob aber diese Buben dergleichen straffe nicht verdienet / die da nicht allein wider mich / jr Vaterland vnd alle Kirchen der Herrschafft / Famos libell getichtet / sondern dieselben auch in die heilige Bibel vnd Gesangbuch der Kirchen zustendig geschriben vnd angeschlagen / lass ich alle fromme Christen vrteilen.

Vnd zwar hette es jnen leichtlich von der Obrigkeit widerfahren sollen / wenn ich M. Spangenberg vnd seines Ordens / sanfftmütiges vnd gedültiges Geistes nur ein wenig gehabt hette.

Wie gar vnrecht mir nun auch in diesem stück M. Spangenberg Lestercarte thut / gebe ich meniglich zu erkennen.

Ob ich auch wol die Bücher welche mit Famos libellen geschendet aus der Kirchen geschafft / vnd denen die sie beschuldiget hatten / habe vberantworten lassen / habe ich doch als balde wie oben vermeldet / andere an die stat ordnen lassen / darumb mich denn kein rechtsinniger verdenccken wird. Darumb hette es der groben vnuerschempten Calumnien / vnd des grossen Zetergeschreies / als hette ich die Bibel gantz vnd gar abgeschafft / vnd wolte keine mehr in der Kirchen dulden / gar nicht bedurfft.

Das auch M. Spangenberg mich vnd andere (weil wir offtgedachte paradoxa nicht billigen wollen / noch sollen) als die da von der warheit abgefallen / ja

ten / ja als Spötter die da von keiner Religion etwas halten / beschuldigen wil / hat je ein seltsam ansehen.

Denn es müsten mir je das seltsame Leute sein / die von wegen der waren Religion sich mit Weib vnd Kindern / zu zweien malen / von jren Pfardiensten da sie lieb vnd werd gehalten / auch notdürfftige statliche vnterhaltung gehabt / haben verjagen lassen. Ja die auch noch allen Irthumben vnd Secten beständiglich widersprechen / vnd derenthalben allerley gefahr ausstehen müssen / vnd solten doch gleichwol Spötter sein / welchen die Religion kein ernst sey.

Dagegen müssen die jenigen alles allein gethan / vnd den Sieg wider die Kotten vnd Secten erhalten haben / die doch noch jemals einige verfolgung gelieden haben / sondern haben alleine aus festen woluerwarten Deusern / das Creutze wider die Feinde der Wahrheit / gepredigt / vnd mit der Feddern von fernem (denn weit dauon ist gut fürn schus) wider sie gestürmet. Wie der welsche Dechant Johannes Capistranus Anno 1446. auch das Creutz wider die Türcken predigte vnd zu Griechischen Weissenburg auff einem festem Thurm eine Fane mit einem Crucifix hielt / vnd umbschweifete / da andere ins Feld zogen vnd sich mit dem Türcken schlagen musten. Noch durffte der gute Herr im allein den erhaltenen Sieg wider die Türcken zuschreiben / Wie er sich denn dessen in einem Sendebrieffe an den Papst rühmet / daher er denn auch von Aenea Syluio wol tribuliret vnd verlachet wird.

Auch darff W. Spangenberg die jenigen als beständige Martyrer in seinen Calender Canonisiren / die umb obgedachter schewlichen Manicheischen Paradoxon willen / von Christlicher Obrigkeit abgeschafft werden / vermöge Göttliches befehls / Deut.

C

13. Du

13. Du solt den bösen von dir thun/ der dich aus dem Wege/ den der Herr dein Gott dir gebotten hat/ darinne zu wandeln/verfüret hat.

Es heist aber *Causa facit Martyrem non pœna aut persecutio.*

Dies ist also die warhafftige Historia vnd gegen Bericht von langebergischen Kirchenhandel / welchen M. Spangenberg alleine auff meiner Ertz vnd Abgesagten Feinde Bericht mit gar zu groben Calumnien / vnd Lügen gespickt / publiciret hat / vnd ausgehen lassen / welcher er denn sich als der ein Glaubwürdiger Historiographus, ich geschweige ein Theologus sein wil / billich scheuen / vnd ehe denn er in offentlichem Druck heraus gefaren / sich der sachen besser erkündiget haben solte.

Solte doch wol mit solchen possen M. Spangenberg seine grosse Chronicke sampt seinem Jagesteufel verdecktig machen / das einer gedenccken köndte wie er dergleichen Fabelwerck / vnd falsche Bericht von vielen sachen darinnen beschriebe.

Da er auch je meiner nicht hette verschonen wollen / hette er doch meiner gnedigen fromen Christlichen Obrigkeit schonen sollen / Welcher wolweis / wie ernstlich sie durch Gottes gnade / vber der Bekentnis rechtschaffener vnuerfälschter Lere helt / auch wie sie allen Lastern feind vnd wissentlich dieselbigen vngestraft nicht hingehen lasse.

Vnd werden also aus diesem meinem warhafftigen Bericht alle fromme Hertzen / für welche dieser handel kömpt / meine vnschuld vnd M. Spangenburgs grossen mutwillen vnd vnbilligkeit / so er wider mich geübt / gnugsam erkennen.

Wil M. Spangenberg nu an mir erst Ritter werden / nach dem er an andern in gegenwertigem Streit
noch

18

noch zur zeit / wenig Ehre eingelegt? Da er auch je
nicht ruhen kan / Sondern so grosse lust zu Kempffen
vnd zu streitten hat / Wie das er sich denn vmb den
schaden Joseph so wenig bekümmert / vnd nicht wis
der die Sacramentirer streittet / da es itziger zeit viel
nötiger / jme auch viel rhümlicher were / denn das er
mutwilliger weise mit der Erbsünde andere vnschül
dige Leute plaget.

Ob ich aber nun wol weis / das er vnd seines glei
chen diesen meinen warhafften gegen Bericht / vnbe
geiffert vnd vnangefochten nicht lassen wird / (denn
es scheint / das nun mehr dieser Leute grosse lust vnd
freude ist / wenn sie sich nur weidlich mit andern beiss
sen vnd holhieplen sollen) tröste ich mich doch mei
nes guten gewissens vnd des zeugnis vieler ehrlicher
redlicher Leute / die es viel anders wissen / vñ warlich
sich nicht wenig verwundern / wie M. Spangenberg
so gar grobe Calumnien vnd greiffliche vnwarheiten
hat spargieren dürffen. Darumb ist mir es ein gerin
ges / das ich von jm vnd seines gleichen gerichtet
werde.

Der Allmechtige Gott wolle vns in der erkanten
vnd bekanten Warheit seines Worts in einfeltigem
Glauben nach dem Furbilde des heilsamen Worts
vnd Richtschnur des Glaubens / durch seinen heili
gen Geist bestendiglichen erhalten / vnd fur aller teu
scherey behüten / vmb Ihesu Christi seines lieben
Sons willen / welcher vns zu gut nicht Carnem alte
rius Speciei an sich genommen / Sondern ein war
hafftiger / Natürlicher Mensch / aller ding
vns seinen Brüdern gleich (alleine die
Sünde ausgenommen) wor
den ist / Amen.



Handwritten text in a Gothic script, likely a medieval manuscript. The text is arranged in several lines and is significantly faded and mirrored, suggesting bleed-through from the reverse side of the page.

Handwritten text in a Gothic script, likely a medieval manuscript. The text is arranged in several lines and is significantly faded and mirrored, suggesting bleed-through from the reverse side of the page.

Handwritten text in a Gothic script, likely a medieval manuscript. The text is arranged in several lines and is significantly faded and mirrored, suggesting bleed-through from the reverse side of the page.







154347

AB 154 347

ULB Halle 3
002 414 449



87

K





